

HUKUM TRANSAKSI HARTA ORANG HILANG MENURUT PERUNDANGAN ISLAM

Mohd Kamarul Khaidzir Saadan¹, Mohamad Sabri Haron² & Mohd Rofaizal Ibhram¹

¹Kolej Universiti Islam Antarabangsa Selangor, Bangi, Selangor.

²Universiti Kebangsaan Malaysia, Bangi, Selangor.

khaidzir@kuis.edu.my

Abstrak

Terdapat peraturan yang telah digariskan oleh Islam dalam menangani kes-kes harta orang hilang. Tidak dinafikan, status harta orang hilang menjadi perbincangan hangat dalam kalangan ulama fiqh kerana transaksi harta tersebut melibatkan pelbagai pihak yang berkepentingan. Islam sangat menekankan penyelesaian segera terhadap kes-kes berkaitan agar masalah semua pihak terpelihara disamping dapat mengelakkan kebekuan harta dan kesulitan di kemudian hari. Menurut perangkaan hingga 2015 harta yang tidak dituntut dianggarkan berjumlah RM6.6 bilion di dalam institusi kewangan yang melibatkan 18 juta pendeposit manakala dianggarkan lebih RM60 bilion dalam bentuk harta benda seperti hartanah, rumah dan kenderaan. Tujuan kertas ini adalah untuk menganalisis pendapat para fuqaha dalam isu penggunaan dan transaksi harta orang hilang sepanjang tempoh kehilangan. Metodologi kajian yang digunapakai adalah melalui pendekatan kualitatif dengan melakukan pengumpulan maklumat dari sumber-sumber perpustakaan dan laman sesawang yang berwibawa. Hasil kajian ini diharapkan dapat memberikan panduan kepada ahli waris dan pihak-pihak yang terlibat dalam menguruskan harta orang hilang dengan cara yang lebih tepat.

Kata kunci: orang hilang, harta pusaka, muamalah, perundangan Islam

1.0 PENDAHULUAN

Perbincangan mengenai status orang hilang sememangnya menjadi topik penting di dalam bidang perundangan bahkan menjadi isu global yang perlu ditangani dengan sebaiknya. Bencana besar seperti tragedi tsunami pada 26 Disember 2004 melibatkan 13 buah negara dan peristiwa serangan pada 9 November 2001 ke atas Pusat Dagangan Dunia New York memaksa beberapa buah negara melihat kembali peruntukan perundangan sedia ada.

Manakala di Malaysia, isu orang hilang menjadi sebutan ramai apabila berlaku tragedi kehilangan pesawat MH370 milik Sistem Penerbangan Malaysia (MAS), yang membawa bersama-samanya 239 penumpang dan anak kapal ketika dalam perjalanan dari Kuala Lumpur ke Beijing pada 8 Mac 2014. Setelah usaha mencari selama 327 hari dilakukan dan tidak menemui apa-apa petunjuk yang kuat, maka pada 29 Januari 2015 Kerajaan Malaysia mengisytiharkan bahawa semua penumpang dan anak kapal pesawat malang itu telah terkorban. (Berita Harian, 2014). Menurut laporan Statistik Orang Hilang Ibu Pejabat Polis Bukit Aman pada 2013, 4998 orang hilang dilaporkan, 2382 orang iaitu kira-kira 48% dijumpai semula. 45% dari mereka yang hilang berusia 18 tahun ke bawah. (PDRM, 2013).

2.0 DEFINISI ORANG HILANG DAN TEMPOH MENUNGGU

Pentafsiran orang hilang memerlukan penjelasan awal dari sudut istilah bagi memastikan pengertiannya dapat difahami dengan sempurna dan tepat kerana ia menjadi landasan teori kepada kajian ini. Para ulama berbeza-beza pandangan dalam menentukan maksud dan ciri-ciri orang hilang.

Mazhab Hanafi mendefinisikan sebagai seseorang yang hilang tanpa diketahui dimana berada samada masih hidup atau mati (Ibn ‘Ābidīn, 2003). Manakala al-Mauṣili dilihat lebih terperinci iaitu seseorang yang hilang dari kaum keluarga dan tempat tinggalnya, dan tidak diketahui samada masih hidup atau mati serta di mana berada hinggalah berlalu satu tempoh yang panjang akan kehilangannya (al-Mauṣili, t.t).

Fuqaha Maliki juga memberikan definisi yang hampir sama iaitu seseorang yang tidak sampai beritanya kepada pemerintah, juga tidak sampai kepadanya surat utusan, bahkan anggota keluarga dan ketuanya juga tidak tahu di mana dia berada. Setelah pemerintah mengarahkan pencarian namun gagal dijumpai maka hendaklah ditentukan tempoh hilangnya (Mālik, 1994). Manakala fuqaha Syafi’i dan Hanbali menambah dalam tafsiran mereka para tawanan perang dan pengembara yang terputus khabar berita (Al-Nawāwī, 1992) (Al-Bāhūti, 1982).

Walaupun terdapat perbezaan dari sudut pentakrifan, namun pada hakikatnya terdapat persamaan dari sudut prinsipnya. Berdasarkan pentafsiran-pentafsiran tersebut, bolehlah dirumuskan bahawa seseorang itu dianggap hilang apabila:

- (a) Terputus khabar berita
- (b) Tidak diketahui di mana berada
- (c) Tidak diketahui samada hidup atau mati
- (d) Telah dilakukan usaha pencarian yang bersungguh-sungguh.
- (e) Berlalu tempoh yang boleh dianggap hilang

Para fuqaha melihat secara positif dengan menganggap orang yang hilang itu masih hidup sehinggalah dapat dibuktikan dengan kukuh bahawa dia telah mati. Pendirian para fuqaha ini berdasarkan kaedah *istiṣḥab* iaitu sesuatu hukum itu merujuk kepada keadaan asal sehinggalah ada dalil yang menunjukkan sebaliknya. Maka dalam tempoh tersebut hartanya tidak boleh diwarisi, digunakan, diniagakan atau dijual sehinggalah statusnya diputuskan oleh pemerintah.

Menurut pandangan mazhab Hanafi, Shāfi’ī dalam *qawl jadīd*, Hanbalī jika hilang dalam situasi aman dan Zāhirī, harta orang hilang tidak boleh wariskan dan isteri hendaklah menunggu sehingga satu tempoh yang diyakini beliau telah mati atau perintah anggapan mati oleh mahkamah. Pandangan jumhur fuqaha ini bersandarkan kepada beberapa dalil antaranya sabda Rasulullah SAW yang bermaksud:

“Perempuan yang kehilangan suaminya hendaklah menunggu petunjuk (bāyān) atau berita”

(Riwayat al-Dārquṭnī, al-Baiḥāqī dan al-Dailamī)

Selain itu berdasarkan kaedah *istiṣḥab*, status hidup dan akad perkahwinan masih kekal selagimana tiada petunjuk orang hilang telah mati. Justeru mana-mana pihak tidak boleh memutuskan status orang hilang atau membubarkan perkahwinan mereka tanpa petunjuk yang kuat. Sekiranya tiada khabar berita dalam sesuatu tempoh menunggu dan diyakini orang hilang telah mati, maka isteri dan ahli waris boleh memohon perintah anggapan mati dari mahkamah.

Perkiraan tempoh menunggu ini adalah atas penelitian dan pertimbangan pemerintah berdasarkan prinsip menjaga kemaslahatan pihak-pihak yang terlibat.

Manakala mazhab Mālikī, Shāfi'ī dalam *qawl qadīm*, Ḥanbalī jika hilang dalam situasi tidak aman dan Ibādi pula berpandangan isteri dan ahli waris hendaklah menunggu sehingga empat tahun sebelum memohon fasakh dan perintah anggapan mati oleh mahkamah. Pandangan ini bersandarkan kepada beberapa dalil antaranya ialah ijtiḥad Umar al-Khattab RA. Dalam sebuah āthār sahabat diriwayatkan bahawa Umar al-Khattab RA telah memutuskan bagi kes orang hilang, si isteri hendaklah menunggu sehingga empat tahun *qamari* kemudian barulah wali suaminya menceraikannya. Si isteri hendaklah beriddah selama empat bulan sepuluh hari sebelum beliau boleh berkahwin lain. Para sahabat pada zaman tersebut bersetuju dan bersependapat dengan pandangan Umar hingga mencapai status *ijma' sukūti*. Apabila diputuskan sedemikian dalam membenarkan perkahwinan isteri orang hilang tersebut dalam keadaan berwaspada menjaga kehormatan wanita tersebut, maka dalam urusan pembahagian harta, ia lebih utama supaya berhati-hati dan berwaspada dalam mengagihkannya. (al-Dusūqī, t.t), (al-Shirbīnī, 2000), (al-Bāhūtī, 1982), (Ibn Qudāmā, 1998).

Pandangan yang paling kuat dan lebih sesuai dengan situasi pada zaman ini adalah pandangan jumhur fuqaha iaitu penentuan tempoh tersebut diputuskan oleh hakim tanpa menetapkan tempoh khusus untuk menunggu. Perkara tersebut diserahkan sepenuhnya kepada ijtiḥad pemerintah sama ada bagi situasi yang selamat ataupun situasi yang kebiasaannya berlaku kemusnahan atau kematian. Keputusan hakim atau pemerintah adalah keputusan yang paling sesuai untuk menjaga kemaslahatan orang hilang dan ahli waris. Hal yang demikian kerana seorang hakim akan menyiasat segala bukti untuk memastikan sama ada orang hilang tersebut masih hidup atau telah meninggal dunia. Adalah tidak sesuai pada zaman ini jika membiarkan harta beku tanpa diagihkan dalam satu tempoh yang begitu lama atau empat tahun sedangkan pemerintah berkemampuan untuk melakukan penyiasatan dan mendapatkan segala bukti yang menunjukkan keadaan orang hilang tersebut walaupun sekadar sangkaan yang kuat (*ghalabah al-dzan*). Apatah lagi terdapat pelbagai peralatan dan alat perhubungan moden pada zaman ini yang membolehkan kita mendapatkan sebarang maklumat yang tidak sukar diperolehi pada zaman dahulu.

3.0 HUKUM TRANSAKSI HARTA ORANG HILANG

Secara dasarnya, fuqaha bersepakat bahawa orang hilang ia tidak dianggap sebagai mati kerana asalnya adalah hidup kecuali ada bukti yang menunjukkan orang hilang itu telah mati, atau telah sampai tempoh pada kebiasaan secara *ẓannī* bahawa dia tidak hidup lebih dari usia itu. Oleh itu, orang hilang tidak boleh dianggap sebagai telah meninggal dunia sebaik sahaja didapati hilang, manakala hartanya tidak boleh digunakan atau diwariskan (Saqqā, 2008).). Kematian pemilik harta adalah menjadi syarat utama dalam mewarisi harta pusaka, sedangkan *orang hilang* adalah orang yang masih dalam tempoh pencarian.

Al-Ṣabūnī menyatakan bahawa fuqaha menetapkan hukum berkaitan orang hilang adalah tidak boleh dikahwini isterinya, tidak boleh diwarisi hartanya serta tidak boleh dibelanjakan sehinggalah diketahui keadaannya sama ada masih hidup atau mati. Dalam hal ini fuqaha juga melihat kepada suatu tempoh pada kebiasaannya secara *ẓannī* orang yang hilang itu akan mati dalam tempoh tersebut, serta hakim menetapkan sebagai telah mati (Al-Ṣabūnī, 2008).

Ini bermakna, segala harta alih atau tidak alih hak milik *orang hilang* tidak boleh dijadikan sebagai harta pusaka, dan tidak boleh dibelanjakan atau dirosakkan harta tersebut, kerana harta tersebut masih kekal menjadi hak miliknya sehinggalah ditetapkan oleh hakim atau pihak yang berkewajipan bahawa beliau telah mati atau dikira sebagai mati *hukmī*. Harta dan haknya hendak dipelihara, tidak boleh diagihkan atau dibelanjakan oleh ahli warisnya sehinggalah telah ada bukti yang menyatakan telah mati (Saqqā, 2008).

Namun begitu kehilangan *orang hilang* dalam tempoh yang lama sudah pasti membawa kesulitan kepada ahli keluarga yang tinggal terutama pada perkara-perkara yang melibatkan kewangan. Ini kerana orang hilang turut mempunyai komitmen, tanggungjawab dan liabiliti yang perlu ditunaikan seperti hutang pinjaman, caruman takaful, nafkah, bil-bil bulanan dan sebagainya. Sebagai contoh pinjaman perumahan dan kenderaan beliau perlu dijelaskan setiap bulan bagi mengelakkan caj tambahan dan pelanggaran akad yang boleh membawa kemudaratan kepada ahli keluarga yang tinggal. Dalam hal ini sejauhmana Syarak membenarkan ahli keluarga orang hilang atau wakilnya menggunakan harta beliau bagi tujuan-tujuan tersebut? Adakah transaksi yang dilakukan sepanjang ketiadaannya sah di sisi syarak?

Fuqaha telah membahagikan pengurusan harta orang hilang sepanjang ketiadaannya kepada tiga keadaan iaitu; (i) orang hilang meninggalkan hartanya kepada pemegang amanah, (ii) orang hilang telah mewakilkan kepada seseorang untuk mentadbir hartanya sebelum kehilangan, dan (iii) orang hilang tidak mewakilkan kepada sesiapa sebelum kehilangannya.

3.1 Orang Hilang Meninggalkan Hartanya Kepada Pemegang Amanah

Adalah menjadi tanggungjawab pemegang amanah untuk menjaga dan menguruskan harta wadi'ah sepanjang tempoh yang disepakati atau tempoh ketiadaan orang hilang. Wadi'ah merupakan kontrak di antara satu pihak yang memiliki barang dengan pihak yang diamanahkan untuk berjanji menyimpan barang dengan tujuan untuk dijamin keselamatannya dari kecurian, kerosakan, kehilangan dan seumpamanya. Sekiranya berlaku kerosakan kepada barangan, pihak yang menjaganya tidak diminta membayar gantirugi kecuali ia disebabkan oleh kecuaiannya. Wadi'ah bentuk amanah (*Yad al-Amānah*) ini boleh berubah menjadi bentuk jaminan (*Yad al-Ḍamānah*) apabila pemegang amanah barang atau wang menggunakannya dengan syarat telah memperoleh keizinan dari tuannya seperti yang berlaku dalam industri kewangan. Justeru pemegang amanah tidak boleh menggunakan harta wadi'ah melainkan dengan syarat-syarat yang telah dipersetujui seperti membeli keperluan dan membayar hutang. Firman Allah yang bermaksud:

“Sesungguhnya Allah menyuruh kamu supaya menunaikan amanah-amanah yang diserahkan kepada kamu terhadap pemiliknya.”

(al-Qur'ān, al-Nisā':58)

Ulama telah meletakkan beberapa garis panduan dan syarat dalam menjaga amanah harta orang hilang ini. Pemegang amanah hendaklah melaksanakan tanggungjawab menjaga harta wadi'ah sepanjang ketiadaan orang hilang sebagaimana yang dipersetujui dalam akad wadi'ah. Sebarang transaksi dan penggunaan harta adalah berdasarkan syarat-syarat yang telah dipersetujui dalam akad. Pemegang amanah tidak boleh menjual atau menyerahkan harta tersebut kepada orang lain jika mampu menjaganya dan harta tersebut bukanlah dari jenis mudah rosak, susut nilai dan seumpamanya. Harta tersebut hendaklah dikembalikan semula kepada pemiliknya

apabila tamat tempoh akad atau beliau telah kembali. Sekiranya pemerintah mengisytiharkan anggap mati maka harta tersebut hendaklah diserahkan kepada warisnya (al-Bughā, 2005), (al-Dusūqī, t.t), (Ibn ‘Ābidīn, 2003), (al-Ramlī, 1968).

Pemegang amanah boleh menarik diri dari menjadi diri daripada wadiah pada bila-bila masa yang dikehendaki sama seperti dalam *wakālah*. Walau bagaimanapun penarikan diri ini dibolehkan jika tidak ditentukan masa menjalankan amanah serta tidak bimbang boleh berlaku kemudaratan kepada harta. Dalam situasi pemegang amanah tidak mampu seperti sakit tenat dan dikhuatiri mendatangkan kemudaratan jika terus menyimpannya atau harta tersebut jenis mudah rosak, maka ia hendaklah diserahkan kepada pemerintah. Ini adalah pandangan majoriti fuqaha Shafi’ī, dan satu riwayat dari Hanbali (al-Ramlī, 1968), (al-Bāhūti, 1982). Manakala fuqaha Mālikī, Hanbali dan al-Izz ibn ‘Abd al-Salām berpandangan harta tersebut boleh dijual atau disedekahkan kepada orang Islam kerana perbuatan tersebut lebih mendatangkan kebaikan berbanding dengan terus menyimpannya. Hanbali mensyaratkan sedekah tersebut hendaklah disertakan dengan niat akan membayar gantirugi jika pemiliknya kembali atau memaklumkan kepada ahli waris jika telah diisytiharkan mati. (Mālik, 1994), (al-Ramlī, 1968), (al-Bāhūti, 1982).

Pandangan yang lebih tepat dan sesuai pada zaman ini ialah menyerahkan harta tersebut kepada pemerintah. Pemerintah hendaklah bertindak dengan menjaga kemaslahatan harta dan hak orang hilang serta tanggungannya sepanjang tempoh tersebut. Dalam hal ini seorang pentadbir harta yang baru akan dilantik dengan syarat-syarat yang ditentukan. Al-Izz ibn ‘Abd al-Salām mensyaratkan serahan tersebut hendaklah dengan keyakinan pentadbir harta yang akan dilantik adalah jujur, amanah dan berwibawa. Jika sebaliknya dan dikhuatiri mendatangkan kemudaratan yang lebih besar, maka pemegang amanah tidak boleh menyerahkan kepada pemerintah dan hendaklah menjual atau menyedekahkan kepada orang Islam.

3.2 Orang Hilang Telah Mewakilkkan Kepada Seseorang Untuk Mentadbir Hartanya

Seseorang boleh mewakilkkan orang lain untuk menggantikannya dirinya sepanjang ketiadaannya. Konsep ini panggil *wakālah* yang bermaksud menyerahkan atau melantik seseorang untuk menjadi wakil dalam menjalankan sesuatu pekerjaan atau urusan dengan syarat perkara tersebut haruslah perkara yang dibolehkan oleh syarak dan ianya merangkumi pelbagai aspek yang boleh diwakilkkan tidak kira dalam perniagaan, perundangan, perkahwinan mahupun urusan seharian. Pensyariatan kontrak *wakālah* ini adalah bukti bahawa manusia itu sifatnya lemah, tidak boleh hidup bersendirian dan memerlukan antara satu sama lain untuk menguruskan hal ehwal kehidupannya.

Menurut fuqaha Mālikī, Shafi’ī dan Ḥanbalī *wakālah* adalah tindakan seseorang mewakilkkan kepada orang lain perkara-perkara yang boleh dilakukannya yang terdiri daripada perkara yang boleh diwakilkkan semasa hayatnya. Tindakan itu tidak dikaitkan dengan pemberian kuasa setelah mati, kerana jika dikaitkan dengan tindakan setelah mati bererti sudah berbentuk wasiat (al-Zuhayli, 1997), (al-Jazīri, 2001), (al-Shirbīni, 2000). Manakala menurut fuqaha Hanafi ialah menyerahkan tugas kepada orang lain untuk melakukan sesuatu perkerjaan yang diharuskan syarak atau sebagai mewakilkkan seseorang untuk menyerahkan dan menjaga sesuatu perkara kepada wakil. Hal ini merangkumi segala pengendalian dan juga pengurusan harta dalam bentuk jual beli atau perkara-perkara yang boleh diwakilkkan seperti izin untuk masuk (al-Zuhayli, 1997), (al-Jazīri, 2001), (Ibn al-Humām, 1993).

Dalam konteks pengurusan harta orang hilang, seorang wakil itu berhak menjalankan urusan-urusan berkaitan harta beliau selagimana akad dan persetujuan antara dua pihak masih berjalan. Sementara itu persetujuan awal antara kedua belah pihak hendaklah mematuhi syarat-syarat sah wakalah. Syarat ini bergantung kepada terma yang telah diberikan oleh pewakil kepada wakil dan juga perkara-perkara yang diwakilkan itu (al-Zuhayli, 1997). Para fuqaha telah meletakkan syarat-syarat tertentu kepada semua rukun dalam wakalah iaitu syarat kepada pewakil, wakil dan juga syarat bagi perkara yang diwakilkan

Pewakil adalah disyaratkan orang yang berhak dan berkelayakan untuk mengendalikan harta yang hendak diwakilkan. Oleh itu, tidak sah sekiranya pewakil itu merupakan seorang yang gila atau kanak-kanak yang belum mumayyiz. Seorang kanak-kanak yang mumayyiz hanya boleh melantik wakil dalam perkara-perkara yang bermanfaat sahaja dan sekiranya diberi keizinan oleh walinya seperti dalam urusan jual beli dan sewaan. Pandangan fuqaha Shafi'i, Maliki dan Hanbali menolak perwakilan yang dilakukan oleh seorang kanak-kanak kerana ia sendiri tidak berupaya dan berkelayakan untuk mengendalikan pekerjaan tersebut (al-Zuhayli, 1997), (al-Jaziri, 2001), (al-Shirbini, 2000).

Wakil yang hendak dilantik mestilah seorang yang berakal dan baligh menurut jumhur fuqaha. Fuqaha Shafi'i, Maliki dan Hanbali menegaskan bahawa tidak sah melantik seorang wakil daripada kanak-kanak walaupun mumayyiz kerana mereka tidak dipertanggungjawabkan dengan hukum-hukum syarak. Manakala fuqaha Hanafi pula menyatakan sebaliknya iaitu sah melantik wakil daripada seorang kanak-kanak yang mumayyiz (al-Zuhayli, 1997), (al-Jaziri, 2001).

Perkara-perkara yang diwakilkan (*muwakkal fih*) pula mestilah sesuatu yang diharuskan syarak dan diketahui oleh wakil. Ini kerana sekiranya perkara tersebut adalah haram dan ditegah syarak maka hukum pelantikan itu tidak sah dan terbatal dengan sendirinya. Manakala jika wujud kesamaran atau tidak diketahui oleh wakil perkara-perkara yang diwakilkan maka dikhuatiri akan berlaku penipuan dan boleh menyebabkan implikasi yang buruk. (al-Nawawi, 2003). Di samping itu, perkara yang hendak diwakilkan mestilah hak milik pewakil. Perwakilan juga mestilah perkara yang diharuskan untuk diwakilkan seperti dalam urusan atau kendalian harta, memungut atau menjelaskan hutang, perkahwinan dan perundangan. Para fuqaha mengharuskan perwakilan yang berkaitan dengan penerimaan dan pembayaran harta contohnya seperti pembayaran zakat, kafarah dan sedekah. Selain itu, diharuskan melantik wakil bagi urusan penyembelihan korban dan haji atau umrah dengan syarat pewakil tidak berkemampuan dari sudut fizikal untuk melaksanakan ibadah tersebut (al-Zuhayli, 1997).

Wakalah adalah kontrak yang melibatkan hubungan dua hala iaitu antara pewakil dan wakil. serta bergantung kepada masa, tempat dan keadaan. Kontrak ini bersifat sementara dan akan berakhir apabila beberapa perkara yang telah dipersetujui tercapai. Antara perkara yang menyebabkan berakhirnya kontrak *wakalah* iaitu apabila perkara yang diwakilkan telah selesai dilaksanakan oleh wakil. Setelah urusan atau pekerjaan yang diwakilkan telah dilaksanakan oleh wakil maka tiada lagi urusan antara pewakil dengan wakil dan berakhirnya wakalah antara kedua-dua belah pihak (al-Zuhayli, 1997), (al-Bughā, 2005).

Selain itu, ianya juga berakhir apabila pewakil melucutkan keahlian wakil atau pewakil menarik semula urusan yang diwakilkan daripada wakilnya berdasarkan sebab-sebab yang tertentu dan mestilah tidak melanggar segala syarat semasa akad dilakukan. Kontrak ini juga akan tamat apabila salah satu pihak daripada pewakil atau wakil hilang keupayaan seperti perkara yang diwakilkan tidak lagi menjadi pemilik pewakil atau bukan lagi dibawah jagaannya. Begitu juga sekiranya wakil hilang keupayaan untuk menguruskan urusan yang diwakilnya

seperti meninggal dunia atau gila yang berterusan. Dalam situasi yang melibatkan pewakil hilang, wakil adalah berhak menjalankan segala urusan yang diwakilkan seperti yang dipersetujui dalam kontrak selagimana pewakil tidak diisytiharkan mati. Namun begitu jika wakil menarik diri daripada melakukan urusan yang diwakilkan atau enggan meneruskan tugasnya maka kontrak *wakalah* akan terbatal dengan sendirinya (al-Zuhaylī, 1997), (al-Ramlī, 1968), (Ibn ‘Ābidīn, 2003), (al-Dusūqī, t.t), (al-Shirbīnī, 2000), (Al-Bahūtī, 1982). Fuqaha Ḥanafīyyah pula berpandangan tugas wakil adalah terhad kepada menjaga harta pewakil sahaja dan tidak boleh bertindak lebih dari itu. Ini kerana hak menjalankan transaksi ke atas harta orang hilang diharuskan kepada ahli waris sahaja (Ibn al-Humām, 1993), (Ibn ‘Ābidīn, 2003), (Ibn Nujaym, 1997).

3.3 Orang Hilang Tidak Mewakilkan Kepada Sesiapa Untuk Mentadbir Hartanya

Keluarga atau waris orang hilang akan menghadapi kesukaran mentadbir harta beliau sekiranya orang hilang tidak mewakilkan kepada sesiapa untuk mentadbir hartanya. Apatah lagi tempoh kehilangan beliau mengambil masa yang begitu lama sehingga menunggu keputusan status orang hilang oleh mahkamah. Pada masa yang sama keluarga yang ditinggalkan perlu memenuhi tuntutan hidup selain daripada kehilangan tulang belakang keluarga tersebut. Keadaan ini menjadi lebih sukar apabila harta orang hilang dibekukan dari sebarang transaksi dan ahli keluarga perlu menggunakan saluran undang-undang untuk mendapat hak mereka.

Dalam situasi ini, pemerintah berhak memberikan keizinan kepada keluarga orang hilang untuk menggunakan harta beliau dengan tujuan menampung keperluan hidup. Tindakan pemerintah adalah atas dasar menjaga masalah dan mengelakkan kesulitan sama ada kepada orang hilang ataupun ahli keluarganya. Kebenaran menguruskan harta ini meliputi keperluan asas, tanggungan, hutang-piutang dan lain-lain yang berkaitan. Bagi memudahkan pentadbiran, hakim akan melantik seorang atau lebih pentadbir harta yang kebiasaannya terdiri daripada ahli keluarga terdekat berdasarkan syarat-syarat yang telah ditetapkan. Pentadbir harta yang dilantik akan menguruskan harta orang hilang ini sementara menunggu beliau kembali atau pengisytiharan anggapan mati oleh mahkamah. Dalam hal ini pentadbir harta mewakili pemilik harta dalam perkara-perkara yang ditentukan oleh pemerintah.

Secara umumnya, isteri dan anak-anak dibolehkan membelanjakan harta orang hilang dengan tujuan menampung kehidupan dan perbelanjaan harian sahaja. Namun sekiranya isteri tidak mampu bersabar atau tidak memiliki harta, maka isteri berhak mendapatkan bahagian tertentu dari harta suaminya yang dibekukan pada tingkat *hājāt* melalui proses pengadilan. Permohonan tuntutan harta hanya melibatkan harta alih sahaja seperti wang tunai dan kenderaan. Harta yang bersifat tidak alih seperti tanah dan kereta tidak boleh dituntut bahagiannya dijual untuk tujuan kelestarian hidup melainkan dalam situasi yang terdesak (al-Zuhayli, 1997), (Fatwa Brunei, 1999).

Dalam konteks pengurusan harta yang lebih baik dan sistematik, kebekuan dan pelupusan harta adalah perkara yang seharusnya dielakkan. Justeru itu majoriti fuqaha berpandangan pemerintah juga berhak memberi izin untuk menyewakan atau menyerahkan kepada pihak lain sebagai *wadī'ah* (pegangan amanah) atau pentadbir harta sekiranya cara tersebut lebih baik dalam mengekalkan kualiti atau mengembangkan harta. Di samping itu dibolehkan memberikan keizinan menjual harta orang hilang sebagai jalan terakhir sekiranya harta tersebut dalam kategori mudah rosak atau luput sedangkan tiada alternatif lain yang boleh mengekalkan sifat asal harta itu (Ibn ‘Ābidīn, 2003), (Al-Dusūqī, t.t), (Al-Shirbīnī, 2000), (Al-Bahūtī, 1982)

Pandangan fuqaha dalam situasi ini bolehlah dirumuskan seperti berikut:

- (a) Kuasa memberikan keizinan ke atas sebarang transaksi dan penggunaan harta orang hilang adalah menjadi tanggungjawab pemerintah atau hakim.
- (b) Pemerintah atau hakim berkuasa untuk melantik pentadbir harta sebagai wakil kepada pemilik harta dengan syarat-syarat yang ditentukan.
- (c) Harta yang ditinggalkan oleh orang hilang tidak boleh digunakan melainkan pada perkara-perkara yang berkaitan dengan keperluan dan tanggungan seperti perbelanjaan ahli keluarga dan hutang-piutang.
- (d) Dalam keadaan tertentu, pemerintah berhak memberi izin kepada ahli waris untuk menguruskan harta orang hilang seperti menyewakan atau menjalankan urusan niaga demi menjaga kemaslahatan harta.
- (e) Pemerintah juga berhak memberi izin pentadbir harta untuk menjual harta dalam kategori mudah rosak, luput atau susut nilai sekiranya tiada alternatif lain yang boleh mengekalkan sifat dan nilai harta tersebut.
- (f) Syarat-syarat pengurusan harta orang hilang hendaklah berdasarkan menjaga kemaslahatan harta dan pemiliknya serta mengelakkan kemudaratan dan kerosakan.

4.0 KESIMPULAN

Sistem Pewarisan Islam mengandungi aturan hukum yang bertujuan menjamin keadilan dan masalah pemilik harta dan ahli waris. Kehilangan pemilik harta dalam tempoh yang lama mendatangkan kerumitan dan kepada ahli keluarga dan waris untuk menguruskan harta dan melaksanakan tanggungjawab yang ditinggalkan. Justeru pelbagai instrumen pentadbiran harta diperuntukkan oleh syarak demi memudahkan urusan keluarga dan ahli waris sepanjang kehilangan pemiliknya. Pemilik harta hendaklah merancang pentadbiran hartanya seperti akad wadi'ah atau wakalah terhadap hartanya sebagai persediaan sekiranya berlaku sesuatu yang tidak diingini seperti hilang dalam tempoh yang lama. Dalam keadaan pemilik harta hilang tanpa berita dan tidak mewakilkan kepada sesiapa untuk mentadbir hartanya maka ahli keluarga boleh memohon perintah mahkamah untuk mendapat keizinan tersebut. Pihak mahkamah boleh melantik pentadbir harta sama ada dalam kalangan ahli waris atau pihak lain yang diyakini mampu menjalankan tugas-tugas pentadbiran dan menjaga kemaslahatan pihak-pihak yang terlibat. Pentadbiran ini adalah bersifat sementara dan terhad kepada perkara-perkara tertentu sahaja dan berakhir dengan kepulangan pemiliknya atau perintah anggapan mati oleh mahkamah.

5.0 RUJUKAN

- Al-Bāhūti, Mansūr Yūnus (1980). *Al-Rauḍ al-Murabba'*. Al-Riyadh: Maktabah al-Riyadh.
- Al-Bāhūti, Mansūr Yūnus (1982). *Kasyyāf al-Qinā' 'an Matan al-Iqna'*. Beirut: Dar al-Fikr.
- Al-Bughā, Muṣṭafa et al. (2005). *Al-Fiqh al-Manhaji*, Damsyik: Dar al-Qalam.
- Al-Bukhārī (2004). *Ṣaḥīḥ Bukhārī*. Kaherah: Dār al-Afāq al-'Arabiyyah.
- Al-Dusūqi. Shamsuddīn Muḥammad bin 'Arafah (t.t). *Hasyiah Dusūqi 'ala al-Syarh al-Kabīr*. Beirut: Dar 'Ihya' al-Kutb al-'Arabiah.
- Al-Jazīri, 'Abd al-Raḥmān bin Muḥammad (2001), *Al-Fiqh 'alā al-Mazāhib al-Arba'ah*, Kaherah: Muassasah al-Mukhtar.

- Al-Mardāwi. Ala' al-Dīn Abu al-Hasan bin Sulaimān (1958). *Al-Inṣāf fī Makrifat al-Rājih min al-Khilāf*. Beirut: Dar 'Ihya' al-Turath al-'Arabi.
- Al-Mauṣilī, 'Abdullah Mahmūd Maudūd (t.t). *Al-Ikhtiār li Ta'līl al-Mukhtār*. Beirut: Dar al-Kutub al-Ilmiah.
- Al-Nawāwī, Yahyā bin Sharaf (1992). *Rauḍah al-Ṭālibīn*. Beirut: Dar al-Kutub al-Ilmiah.
- Al-Ramli, Shamsuddīn Muḥammad bin Aḥmad Shihābudin (1968). *Nihāyat al-Muḥtāj ilā Adillah al-Minhāj*. Kaherah: Mustafa al-Babi al-Halabi.
- Al-Ṣābūnī, Muḥammad 'Alī (1985). *Al-Mawārith fī al-Sharī'ah al-Islāmiyyah*. Beirut: Dar al-Fikr.
- Al-Sarkhasi, Shamsuddin Abu Bakr Muḥammad bin Aḥmad (1986). *Al-Mabsūt*. Beirut: Dar al-Makrifah.
- Al-Shirbīnī, Shamsuddin Muḥammad bin Aḥmad al-Khatīb (2000). *Mughnī al-Muḥtāj ilā Ma'rifat Ma'āni Alfāḥ al-Minhāj*. Beirut: Dar al-Kutub al-Ilmiah.
- Al-Tirmizī (2004). *Sunan al-Tirmizī*. Kaherah: Dār Ibn Al-Haitham.
- Al-Zaila'i, Fakhruddin Uthmān bin 'Alī. 1896. *Tabyīn al-Ḥaqāiq Syarh Kanz al-Daqāiq*. Bulaq: al-Matba'ah al-Amiriah.
- Al-Zuhaylī, Wahbah (1997). *Al-Fiqh al-Islāmī wa Adillatuhu*. Damsyiq: Dar al-Fikr.
- Fatwa Mufti Kerajaan Brunei Darussalam, (1999). *Anggapan Orang Hilang*. Jabatan Mufti Kerajaan, Jabatan Perdana Menteri, Negara Brunei Darussalam.
- http://ww1.utusan.com.my/utusan/Ekonomi/20130926/ek_02/RM66b-harta-tidak-dituntut, 26 September 2013. (Capaian pada 15 November 2015).
- <https://www.bharian.com.my/node/138450>, *RM60b harta umat Islam tidak dituntut*. (Capaian pada 02 November 2017).
- <https://www.bharian.com.my/node/3844>, *MH370: Tiga negara setuju seragam media salur maklumat pencarian*. (Capaian pada 01 September 2014).
- Ibn 'Ābidīn, Muḥammad Amīn (2003). *Radd al-Mukhtār 'alā a-Dur al-Mukhtār fī Syarh Tanwīr al-Abṣār; Hashiyyah Ibn 'Ābidīn*. Riyadh : Dar 'Alam al-Kutub.
- Ibn al-Humām. Kamāl al-Dīn Muḥammad bin 'Abd al-Wahīd (1993). *Syarah Fath al-Qadīr*. Beirut: Dar al-Kutub al-Ilmiah.
- Ibn Nujaym, Zainuddin Ibrahim Muhammad (1997). *Al-Baḥr al-Rāiq Syarh Kanz al-Daqāiq*. Beirut: Dar al-Kutub al-Ilmiah.
- Ibn Qudāmā, Mawaffaq ad-Dīn aAbdullāh ibn Ahmad al-Maqdisi (1998). *Al-Mughnī 'alā Mukhtasar al-Khiraqi*. Riyadh : Dar 'Alam al-Kutub.
- Mālik bin Anas (1994). *Al-Mudawwanah al-Kubrā*. Beirut: Dar al-Kutub al-Ilmiah.
- Saqqā, 'Abd al-Mun'im (2008). *Ahkām al-Ghāib wa al-Mafqūd fī al-Fiqh al-Islāmī*. Damsyiq: Dar al-Nawadeer.